



*Kamis, 20 Juli 2023*  
**Ogen: Amos 1:13-15**



**Mburtasken**



**I**bas kuta kami lit istilahna mburtasken tambak. Kata enda rusur ibelasken kalak si pendahinna ersabah. Biasana sabah e pegancihen ibahan senuanna. Sekali nuan page sekali nari jadi kolam nurung. Dung kenca rani page, kolam e minter iisi launa arah lau anak nari. Kenca dem launa tama bibit nurung banci nurung mas entah nila. Timai empat seh lima bulan nurung e enggo ka banci iperani. Carana, kolam e iburtasken, ertina ipekerah alu empedarat launa. Mejile ban mburtaskensa gelah ula ikut ndarat ras ikanna. Kenca tading sitik nari kari lau i bas kolam e enggo banci buat ikanna. Mburtas pe banci ka erkiteken meder kal udan, melala masuk lau ku kolam e dungna lanai tertampungsa. Enggo ganjangen Lau asangken nggalungi sabah, iderpa lau e nggalungi sabah seh rontas, ndarat kerina lau ras ikan bas kolam e nari. Em ikataken mburtas.

Bangsa Amon i bas Pustaka Si badia e me sinursur Lot ras anakna singuda diberu. Sinursurna ras anakna sintua diberu igelari bangsa Moab. Ituriken i bas renungenta maka bangsa Amon la erngadi-ngadi erbahan dosa. Lako nambahi daerah jajahenna, iburtaskenna beltek pernanden si sangana mehuli kulana i Gileat. Perbahanenna e cukup kejam, la ngukuri kemanusiaan, guna kepentingan politik. Mburtasken beltek diberu si sangana natang tuah e biasa ilakoken gelah ieteh anak i bas kandungan e dilaki entah diberu. Adi dilaki mis ibunuh guna engkurangi sinursur musuh. Adi kerina ibunuh si dilaki tentu lanai pagi lit sinerusken generasina.

Bagem adi la erdalan ras Tuhan, lanai meteh mehuli. Kerangapen, kebayaken ngkuasai pusuh. E maka alu erbage cara ilakoken guna nehi sura-sura. Situhuna sura-suranta si la tertebeng me si erbahansa megati kita ndabuh ku bas dosa. Kerina cara si pake, dungna lanai bagi sura-sura Dibata. Perlu si kuasai diri, alu erpersukutem man Tuhan.